



Peskiza foun ne'ebé reforsa lian no aspirasaun husi vendedór feto sira iha fatin merkadu haat iha Timor-Leste

KOMUNIKADU IMPRENSA

Dili, 13 Agostu 2018

Sekretáriu Estadu ba Igualdade no Inkluzau Timor-Leste, hamutuk ho UN Women no Governu Australia ninia programa husi TOMAK, ohin fahe rezultadu sira husi peskiza foun kona-ba kondisaun, dezafiu no oportunidade sira ne'ebé hetan husi merkadu haat (4) iha Bobonaro no Baucau. Peskiza ne'e foka ba esperiénsia no lian husi feto sira, ne'ebé 75-85% nu'udar negosiante husi merkadu rurál iha Timor-Leste. Presidente Autoridade Munisípiu de Baucau no Bobonaro apresenta rezultadu ba stakeholder prinsipál sira iha Dili, inklui representante husi Ministériu Komersiu, Ambiente no Turizmu, Ministériu Obras Públika, no Ministériu Administrasaun Estatál no mós orgaun governamentál sira seluk no ajénsia internasionál sira.

Avaliasaun ne'e hala'o iha merkadu munisipál rua (Baucau no Maliana) no merkadu postu administrativu rua (Venilale no Atabae) liu husi entrevista balu, diskusaun grupu no halo la'o observasaun hamutuk ho vendedór feto no autoridade lokál. Prioridade xave ne'ebé hato'o husi feto sira husi merkadu hotu mak presiza atu hasa'e asesu ba bee moos no saneamentu, hadi'a jestaun lixu, no haforsa jestaun no organiza merkadu. Feto sira mós deskreve kestaun balu kona-ba seguransa (inklui asédiu seksuál no na'ok-teen), bainhira sira la'o ba no fila husi merkadu, no mós bainhira sira halo negósiu ka toba hela iha merkadu. Menus transporte ho nia presu ne'ebé karun atu ba no fila husi merkadu, aumenta tan ho atitute xofér ne'ebé agresivu husi xofér bis, mikrolet no angguna ne'ebé mós hato'o keixa beibeik husi feto sira.

Rezultadu peskiza ne'e hatudu katak iha kondisaun ne'ebé baibain susar ba feto sira atu fa'an sira nia produtu no importansia atu inklui sira nia esperiénsia iha prosesu planeamentu. Vendedór feto ida husi Atabae ne'ebé ohin marka prezensa fahe nia esperiénsia pesoál ida kona-ba asédiu seksuál iha fatin merkadu. "Ha'u dehan ba ha'u nia kolega [depois labarik mane ida book sira dalabarak] *'Ita na'in rua tenke sai ona husi ne'e, ha'u haree seguransa ba ita rua laiha, no se ita he'in to'o aban dadeer, labarik mane ne'e sei book ita... Se osan laiha, laiha buat ida, naran katak ha'u nia dignidade la lakon.'*"

Avaliasaun ne'e mai iha tempu di'ak, tanba agora daudaun planeia hela merkadu foun sira ba Maliana no Baucau, no iha interese husi governu munisipiu no nasional ba iha poténsia merkadu hodi aumenta ekonomia lokál.

"Merkadu ne'ebé seguru no dinámiku iha poténsial atu lori benefisiu ekonómiku ne'ebé importante ba komunidadade sira, liuliu ba feto sira ne'ebé dala barak ativu tebes nu'udar negosiante," tenik Sr. Armando da Costa, Diretór Jerál husi SEII. "Peskiza ne'e hatudu mai ita importánsia buka tuir feto sira-nia lian kona-ba planeamentu, jestaun no organizasaun merkadu. Ida-ne'e mak tempu mai ita atu rona sira, se karik ita hakarak atu hasa'e seguransa no efisiénsia ba merkadu sira iha Timor-Leste."



Autoridade munisípiu sira, polísia no lideransa lokál iha Baucau no Bobonaro envolve maka'as tebes iha peskiza ne'e tomak, no apresentasaun husi rezultadu dahuluk provoka ona diskusaun ida-ne'ebé kle'an kona-ba solusaun ba dezafiu sira ne'ebé iha. Sorumutu ohin loron nian, lori rezultadu ba ministériu prinsipál sira no parseiru dezenvolvimentu iha nivel nasional, atu tau atensaun no konsidera ba oin oinsá bele servisu hamutuk atu rezolve dezafiu sira ne'e no lori benefísiu ba comunidade no ema hotuhotu.